


日本漢文學百家集

105

王焱
編




北京燕山出版社



王焱 主編

日本漢文學百家集
105



北京燕山出版社

第一〇五册

鳳岡林先生全集 卷一〇三至卷一二〇 林鳳岡著 延享元年
……
一

鳳岡林先生全集卷之百三

男 朝散大夫國子祭酒林信充士儔父 輯

文部

說

蓄德說

蓄者止而聚之謂也木之成林松柏槐榆交加錯植
鬱鬱然蒼蒼然群材具而萬籟生所蓄者大也然後
成材也人之行道讀萬卷之書通萬物之理學術才
德克積於內行之於家施之於國所蓄者大也然後
成道也蓋天生蒸民有物有則是以萬物庶事莫不

各有當止之所故文王爲人君則其所當止者在於
仁爲人臣則所當止者在於敬爲人子則其所當止
者在於孝爲人父則其所當止者在於慈與國人交
則其所當止者在於信是皆天理人倫之極知發於
本心之不容已者而光輝之所接續也文王者我師
也有爲者豈不企望之乎易曰君子多識前言往行
以蓄其德苟聞一言見一行審問而謹思明辨而篤
行則所蓄者濟其美所蓄者得其效而止於所居之
位止於所行之事而又日新其德也

明敬說

乎姓奧村氏兵部者參議加賀侯菅君家士之長奧村壹岐嫡子也壹岐語余曰我曾祖因幡守易英從父永福守能州末盛城放矢射退佐佐內藏助兵卒時十四歲是故我家以當十四歲爲嘉例兵部今年齡算及此乃名之曰明敬取諸國語之言請爲之說乃諱之曰敬者一心之主宰萬事之根本也格致須敬脩己須敬治人須敬聖門之學亦不過于此不亦大乎有若無實若虛者心存于內也整齊嚴肅者容見于外也好文之日講武之明主一無適勿貳以一則內正外直敬以日明也余家世世執交而有師資

之義有所期有所祝也曾聞忠臣與孝子不爲昭昭
信節不爲冥冥愔行亦是敬之謂也是以待其君事
其父則敬以明於國敬以明於家乎不可不念不可
不知因作其說云

士僖說

家嗣怱也今茲弱冠字之曰士僖按怱者悅也僖也
僖之爲言樂也此其所取也乃祝之曰棄爾幼志順
爾成德敬爾威儀淑慎爾德兄弟具在以成厥德黃
耇無疆受天之慶也汝曾祖興起我家恢揚儒風汝
祖克繼洪業聲價增重汝父韜心不類其先才乏識寡

然幸積侍講之勞荷祭酒之任外譽之美內省惟疚
汝不辱所生而繩祖之武則祖先之志可大乎家傳
之業可久乎汝能事斯語自激自勵學而弗指時習
之則所學者熟而中心喜悅其進自不能已矣所學
之術推以及人近者遠者繼踵而來信從已衆入僖
樂之地者可以待焉可以期焉程夫子曰樂由說而
後得非樂不足以語君子鈞是人也有爲者亦若是
名字之號職之此由勉哉士僖勉哉士僖因爲之說

貞直說

凡事有始而無終則其志不遂其業不成易曰貞者

事之幹也幹木之身而枝葉所依以立者也以天德
言之則生物之始爲元於時爲春於人爲仁以生物
之通爲亨於時爲夏於人爲禮以生物之遂爲利於
時爲秋於人爲義以生物之成爲貞於時爲冬於人
爲智萬物藏於冬而發于春成于貞而起于元然則
貞者有始有終者也貞之義者正也正亦直也以貞
爲體以直爲用則所守者固而所爲者直也所知不
暗是是非非確乎不可移易也照然不可欺瞞也所
以能立事而有始終能成物而有本末也 麾下執
事壬生城主藤明英君自書貞直二大字而授其家

長石川隆之以爲軍幟也君之大爺勿齋藤君爲石川玄隆親筆節義二大字授之而賞世世忠勤之志也我父弘文院學士亦爲之記玄隆者隆之父也今又追先例之嘉拜手書之賜自非平生所爲所守抱貞直之志則何以臻於茲哉君臣之際父子相繼追彼前規荷此厚惠可謂世世之美一家之珍榮遇之大無過于此祖先志業遂于今日成於其身者乎可以祝之余與隆之相知久矣請記其事乃書以爲後證唯期傳之後昆永以貽厥謀也

貞固說

大矣哉乾之道廣矣哉乾之義故孔夫子作文言申明其理窮盡其蘊也四德運於天而備於人元之在人也爲吾心之慈愛未有衆善而理先具矣既有衆善而理兼該矣與乾之始物統天者一也非善之長乎亨之在人也爲吾心之秩序天理節文人事儀則備于此與乾之品物流形者一也非嘉之會乎至於利則吾心裁制辨定名分親疎貴賤各得其安是卽天道之遂物也非義之和乎至於貞則吾心靈學洞徹衆理事業成始成終皆依之以立是卽天道之成物非事之幹乎從五位下讚岐守瀧川元長字貞固

扁其齋曰惕也請說于余乃諱之曰天以四德生人
人得之以爲生則何人不具此四德乎惟君子能全
其體者所以君子之心終日乾乾法乾之健也凡人
之情未有不謹於朝而弛於夕君子不以隱顯二其
心其視屋漏暗室無以異於十目十手之嚴也故雖
高雖滿無危溢之患悉無不依夕惕之義也元與貞
者四德之始終也元以兼三者故曰善之長也貞以
成三者故曰正而固也見之行事者夕惕也宜哉以
元長爲其名以貞固爲其字以惕名其齋也古曰天
人一理人之動乃天之運也若以私意而動則人而

不天進退用舍知其時守其分則无適而不正必得
无咎也嗚呼易之道廣大無聖凡之殊無上下之別
君有君之用臣有臣之用父有父之用子有子之用
以至於事物莫皆不然君子乾乾夕惕豈其不庶幾
之乎勉哉勿懈因以爲說云

衡卿說

備後國福山城主下總守松平忠雅者武林閥閱之
家也其先世世功勳著聞巨祿富贍忠雅嗜學好文
與余相識尺牘往來詩筒酬唱請名字於余名之曰
權字之曰衡卿夫權者錘也稱分之謂也天道者權

而後動靜爲根陰陽相分五行順布四時流行而萬物各得其所百昌皆遂其性人道有權而後君臣有義父子有親夫婦有別長幼有序百行有立萬事稱宜權之義大矣哉然無衡則物之輕重不能辨知之物之枉直不能整正之也衡者權之所係也權者衡之所著也一而二二而一也共所平正之義也若無玉衡則不能窺天象也若無輓衡則不能倚車輿也官有阿衡職有銓衡不可一日無權衡者也嗚呼平生事業著眼于此託意于此奉上之誠竭其志撫下之政施其惠則其家齊而其身平其身脩而其心

平其心正而其意平者不待余所言可以期焉可以知焉因爲衡說云

射說

古曰射者求正諸已而後發發而不中則反求諸已也欲其內志正其外體直也射之義大矣哉故有大射之禮有賓射之禮有鄉射之禮經傳所記可見而識之聖主以射立德諸侯以射盡志武夫以射建功勇士以射受業皆所以習其禮也其力大者有引千鈞者有穿七札者其藝精者有貫虱者有穿楊者左支右屈之術百發百中之妙言之長今不贅之 本

朝之古設爲射塲以試其藝近世洛陽得長壽院其
堂長六十六間世稱之曰三十二間堂也教射禮而
決勝劣武州深川亦移其堂依其樣武夫勇士無遠
無邇並鑣爭馳決拾悉發射而全透三十二間而其
籌多者世稱之曰天下第一自正保丙戌至今年癸
未殆六十年其間發中之多或以千數或以二三千
數或以四五千數或以七八千數至九千五百者唯
一人而已世以爲美譚也今茲孟夏二十三日備牧
石川總榮家土梶川正容年纔十二未爲成童率由
定式射透半堂三十三間者一萬餘本縱送之多無

出其右者況幼齡之力不休不屈前程可祝後生可
畏誰不嘉其之哉傳稱梃川之祖出自楠家其系線
不絕繩繩執執今聞幼邁之技乃知不辱其祖可感
可祝他日激勵不懈則知內外正直之理乎求諸已
友諸已之言豈唯射而已哉於一身受用亦有益乎
勉哉余與備牧相識尚矣頃歲日日遇於 營中請
記此事而貽後證所需難拒因以書之

士疆說

我家次男志也今茲十八歲始加元服而入營門字
之曰士疆志者自勉強也是其所據也乾象不云乎